

Pertimbangan Dasar oleh Bank Negara Malaysia

Sorotan

- Jawatankuasa Dasar Monetari (MPC) mengekalkan Kadar Dasar Semalaman (OPR) pada 1.75% semasa mesyuarat MPC pada bulan Mei dan Julai 2021. MPC menyifatkan pendirian dasar monetari adalah wajar dan akomodatif.
- Langkah-langkah fiskal dan kewangan juga akan terus mengurangkan kesan ekonomi terhadap perniagaan dan isi rumah serta memberikan sokongan kepada kegiatan ekonomi. Bank Negara Malaysia terus komited untuk menggunakan alat-alat dasarnya yang bersesuaian bagi mewujudkan keadaan yang menyokong pemulihan ekonomi yang berterusan.

Dasar monetari kekal akomodatif

Pada mesyuarat Jawatankuasa Dasar Monetari (*Monetary Policy Committee, MPC*) pada bulan Mei dan Julai 2021, Kadar Dasar Semalaman (*Overnight Policy Rate, OPR*) dikekalkan pada 1.75%.

MPC menilai bahawa pemulihan ekonomi global bertambah kukuh, disokong oleh peningkatan dalam aktiviti perkilangan dan perkhidmatan. Walau bagaimanapun, kadar pemulihan adalah berbeza-beza antara negara. Negara-negara yang mencapai kemajuan yang lebih baik dalam pelaksanaan program pemberian vaksin telah dapat melonggarkan langkah-langkah pembendungan dan membolehkan aktiviti dalam negeri pulih dengan segera. Di beberapa negara maju, sokongan fiskal dan monetari yang besar juga menyokong momentum pemulihan yang lebih kukuh, meskipun aktiviti di beberapa negara terganggu disebabkan oleh langkah-langkah pembendungan yang lebih ketat bagi mengekang penularan semula COVID-19. Keadaan kewangan kekal menyokong pertumbuhan. Secara keseluruhan,imbangan risiko terhadap prospek pertumbuhan terus cenderung ke arah pertumbuhan menjadi lebih perlahan disebabkan terutamanya oleh ketidakpastian berhubung dengan perkembangan pandemik dan potensi risiko volatiliti pasaran kewangan yang ketara.

Bagi ekonomi Malaysia, kegiatan ekonomi yang lebih baik daripada jangkaan pada suku pertama 2021 berterusan hingga bulan April terutamanya bagi eksport, perbelanjaan runcit dan keadaan pasaran pekerja. Walau bagaimanapun, pelaksanaan semula langkah-langkah pembendungan di seluruh negara untuk mengekang penularan semula kes COVID-19 akan memperlambatkan momentum pertumbuhan. Tahap kesan daripada pelaksanaan langkah-langkah ini

kepada ekonomi sangat bergantung pada ketegasan dan tempoh langkah-langkah pembendungan. Walau bagaimanapun, sebahagian daripada kesan sekatan pergerakan akan dikurangkan oleh kebenaran yang terus diberikan kepada sektor ekonomi perlu (*essential economic sectors*) untuk beroperasi, meskipun pada kapasiti yang berkurang, serta kemampuan yang lebih tinggi untuk menyesuaikan diri bekerja dari jarak jauh, penggunaan automasi dan pendigitalan. Pelbagai pakej sokongan dasar akan meringankan sedikit tekanan kewangan yang ditanggung oleh isi rumah dan perniagaan. Keadaan permintaan luaran yang menggalakkan akan terus memberikan dorongan kepada pertumbuhan. Pada masa hadapan, pengurangan langkah-langkah pembendungan secara beransur-ansur, bersama-sama dengan kemajuan pesat program pemberian vaksin dalam negeri dan permintaan luaran yang terus kukuh akan memberikan sokongan kepada pemulihan pertumbuhan menjelang tahun 2022. Walau bagaimanapun, prospek pertumbuhan terus bergantung pada risiko pertumbuhan menjadi rendah dengan ketara disebabkan terutamanya oleh faktor yang boleh mendorong kepada kelewatan pelonggaran langkah-langkah pembendungan atau pelaksanaan langkah-langkah pembendungan yang lebih ketat, dan pemulihan pertumbuhan global yang lebih rendah daripada jangkaan.

Seperti yang dijangka, inflasi keseluruhan baru-baru ini naik mendadak disebabkan terutamanya oleh kesan asas daripada harga bahan api yang rendah pada suku kedua tahun 2020. Peningkatan mendadak ini adalah bersifat sementara dan inflasi keseluruhan diunjurkan sederhana pada tempoh terdekat apabila kesan asas ini luput. Bagi tahun 2021, inflasi keseluruhan diunjurkan lebih hampir dengan angka yang lebih rendah dalam julat unjuran yang diumumkan sebelum ini.¹¹ Inflasi asas, seperti yang diukur oleh inflasi teras, dijangka kekal rendah, berpurata antara 0.5% hingga 1.5% untuk tahun ini, dalam keadaan lebihan kapasiti yang berterusan dalam ekonomi. Walau bagaimanapun, prospek ini bergantung pada perkembangan harga komoditi global.

MPC menyifatkan pendirian dasar monetari adalah wajar dan akomodatif. Selain itu, langkah-langkah fiskal dan kewangan akan terus mengurangkan kesan ekonomi terhadap perniagaan dan isi rumah serta memberikan sokongan kepada kegiatan ekonomi. Berikutan keadaan pandemik yang tidak menentu, pendirian dasar monetari akan terus ditentukan oleh data dan maklumat baharu serta kesannya kepada prospek keseluruhan inflasi dan pertumbuhan dalam negeri. Bank Negara Malaysia terus komited untuk menggunakan alat-alat dasarnya yang bersesuaian bagi mewujudkan keadaan yang menyokong pemulihan ekonomi yang berterusan.

¹¹ Inflasi keseluruhan bagi tahun 2021 yang diunjurkan sebelum ini berpurata antara 2.5% hingga 4.0%, seperti yang diterbitkan dalam Tinjauan Ekonomi dan Monetari 2020 BNM.

Sorotan dasar lain pada suku kedua 2021

Sorotan dasar	Butiran penting
Kertas Perbincangan tentang Rangka Kerja Modal Berasaskan Risiko untuk Penanggung Insurans dan Pengendali Takaful (Reka Bentuk Rangka Kerja)	• Kertas Perbincangan yang diterbitkan pada 30 Jun 2021 menggariskan cadangan penambahbaikan pada reka bentuk rangka kerja kecukupan modal untuk penanggung insurans berlesen dan pengendali takaful berlesen (<i>insurers and takaful operators</i>, ITO). Kertas Perbincangan ini membentuk sebahagian daripada semakan berperingkat yang dilaksanakan oleh Bank terhadap keseluruhan rangka kerja kesolvenan. • Cadangan penambahbaikan ini bertujuan memastikan rangka kerja terus berkesan dalam keadaan pasaran yang berubah-ubah dan memudahkan pengukuran kecukupan modal yang konsisten dan setara merentas ITO. • Tumpuan utama Kertas Perbincangan ini ialah - - o pengiktirafan keupayaan tindakan pengurusan untuk menyerap kerugian di bawah Jumlah Modal Tersedia; - o tahap risiko sasaran yang sesuai untuk penentuan caj modal; - o kaedah pengukuran komponen risiko di bawah Jumlah Modal Diperlukan; dan - o kebolehlaksanaan mengira Nisbah Kecukupan Modal untuk ITO menggunakan satu formula, dengan mengambil kira keunikan model perniagaan insurans dan takaful. • Kertas Perbincangan ini diterbitkan untuk maklum balas hingga 30 September 2021.
Dokumen Dasar berhubung dengan Pencegahan Pengubahan Wang Haram, Pencegahan Pembiayaan Keganasan dan Sekatan Kewangan Bersasar untuk Institusi Kewangan (Anti-Money Laundering, Countering Financing of Terrorism and Targeted Financial Sanctions for Financial Institutions) (Dokumen Tambahan No. 1) - Sektor Perniagaan Perkhidmatan Wang	• Dokumen Dasar ini diterbitkan pada 30 Jun 2021. • Dokumen Dasar ini menetapkan keperluan minimum yang perlu dipatuhi oleh perniagaan perkhidmatan wang yang dilesenkan di bawah Akta Perniagaan Perkhidmatan Wang 2011 ketika melaksanakan proses pengesahan tanpa bersemuka semasa menerima pelanggan korporat. • Dokumen Dasar ini bertujuan memastikan langkah kawalan dan sistem Pencegahan Pengubahan Wang Haram dan Pencegahan Pembiayaan Keganasan yang berkesan dilaksanakan bagi melindungi integriti perniagaan perkhidmatan wang.
Draf Dedahan tentang Wang Elektronik (E-Wang)	• Draf Dedahan yang diterbitkan pada 11 Jun 2021 menggariskan cadangan penambahbaikan keperluan pengawalseliaan yang perlu dipatuhi oleh pengeluar e-wang yang diluluskan (<i>e-money issuers</i>, EMI). • Keperluan yang dicadangkan bertujuan untuk memastikan keselamatan dan kebolehpercayaan e-wang yang dikeluarkan oleh EMI supaya dapat mengekalkan keyakinan pelanggan dan peniaga bagi menerima e-wang untuk pembayaran barangan dan perkhidmatan. • Tumpuan utama Draf Dedahan ini termasuk: - o Keperluan dana modal minimum yang dikenakan ke atas EMI mengikut kadar selaras dengan saiz operasi mereka; - o Cadangan pengecualian daripada keperluan kebenaran diberikan kepada EMI bertujuan terhad; - o Keperluan yang lebih ketat berhubung dengan perlindungan dana pelanggan; dan - o Keperluan kehematan yang ditambah baik seperti tadbir urus dan pengurusan risiko operasi. • Draf Dedahan ini diterbitkan untuk maklum balas hingga 31 Julai 2021.

Sorotan dasar lain pada suku kedua 2021

Dokumen Dasar berhubung dengan Pelan Strategik Korporat IKP	• Dokumen Dasar ini menetapkan keperluan terhadap institusi kewangan pembangunan (IKP) untuk membentuk pelan strategi korporat yang menyeluruh dan bersepadu yang merangkumi rancangan perniagaan dan keperluan dana mereka. • Pelan strategik ini bertujuan untuk meningkatkan tumpuan IKP terhadap hasil dan mandat pembangunan mereka, disokong oleh pengenalanpastian dan pengukuran yang jelas tentang ‘tambahan’ (<i>additionalities</i>) (ditakrifkan sebagai kesan positif yang disebabkan oleh IKP melebihi kesan yang dihasilkan di bawah persekitaran yang didorong oleh keuntungan semata-mata). • Dokumen Dasar ini diterbitkan pada 27 Mei 2021.
Kertas Perbincangan tentang Kadar Rujukan Alternatif dan Hala Tuju Strategik KLIBOR dan KLIRR untuk Pasaran Kewangan Malaysia	• Kertas Perbincangan ini diterbitkan pada 19 Mei 2021 untuk mendapatkan maklum balas tentang rangka kerja, reka bentuk dan ciri-ciri yang berkaitan dengan pembangunan Kadar Rujukan Alternatif (Alternative Reference Rate, ARR), potensi penambahbaikan Kadar Tawaran Antara Bank Kuala Lumpur (Kuala Lumpur Interbank Offered Rate, KLIBOR) serta semakan terhadap Kadar Rujukan Islam Kuala Lumpur (Kuala Lumpur Islamic Reference Rate, KLIRR). • Kertas Perbincangan ini menggariskan cadangan ciri-ciri ARR berdasarkan transaksi, cadangan penambahbaikan dan pelan sandaran untuk KLIBOR, serta hala tuju masa depan KLIRR. • Kertas Perbincangan ini dihasilkan daripada perbincangan dengan Jawatankuasa Pasaran Kewangan dan diterbitkan untuk maklum balas hingga 18 Jun 2021.
Perubahan Iklim dan Taksonomi Berasaskan Prinsip	• Dokumen ini dihasilkan dengan kerjasama Jawatankuasa Kecil Pengurusan Risiko di bawah Jawatankuasa Bersama Mengenai Perubahan Iklim (Joint Committee on Climate Change, JC3). Dokumen ini memperkenalkan taksonomi berasaskan prinsip bagi menilai dan mengelaskan kegiatan ekonomi berdasarkan tahap pencapaian matlamat iklim dan penggalakan peralihan kepada ekonomi rendah karbon serta tahap kesan kegiatan tersebut terhadap alam sekitar. Taksonomi ini memudahkan pengelasan dan pelaporan dedahan berkaitan iklim yang standard oleh institusi kewangan bagi menyokong penilaian risiko, penzahiran kewangan berkaitan risiko iklim dan aliran kewangan ke arah menyokong matlamat iklim. • Pengelasan yang standard membahagikan kegiatan ekonomi kepada 3 kumpulan besar berdasarkan 5 prinsip panduan yang merangkumi mitigasi perubahan iklim, adaptasi perubahan iklim, kegiatan yang tidak menyebabkan kesan buruk kepada alam sekitar, usaha pemulihan bagi menggalakkan peralihan, dan kegiatan terlarang: - o Menyokong Iklim – Kegiatan yang memberikan impak positif kepada perubahan iklim dan tidak memberikan kesan buruk yang ketara kepada alam sekitar; - o Peralihan – Kegiatan yang menyebabkan kesan buruk yang ketara kepada alam sekitar, namun usaha pemulihan dilaksanakan untuk mengurangkan kesan buruk; dan - o Di Bawah Pemantauan – Kegiatan yang menyebabkan kesan buruk yang ketara kepada alam sekitar dan usaha pemulihan tidak dilaksanakan untuk mengurangkan kesan buruk. • Pendekatan berasaskan prinsip mempertimbangkan perniagaan yang mempunyai status peralihan yang pelbagai ke arah amalan lestari dan menggalakkan usaha untuk mencapai peralihan ekonomi yang teratur dalam memenuhi matlamat iklim. • Dokumen ini diterbitkan pada 30 April 2021.